

四庫全書

集部

欽定四庫全書

宋元詩會卷九十三

兵部主事陳焯編

丁復

宇仲容天台人徙居金陵之城北其地深僻有園亭之勝左右列植古檜蒼茂若雲客至款坐亭上脩然以為樂仲容學博才敏為詩精麗奇偉格超而趣遠非時流所及集名檜亭稿其壻饒介之所編而序之者中山李桓也

有鳥

有鳥有鳥鳴聲嘒嘒自東有居則西于巢有翩者翼載  
戢載翹曷往曷否中心搖搖有鳥有鳥鳴聲孔悲生此  
東隅息彼西枝有翩者翼逝將奮飛我行遲遲莫知所  
依維東有山嶺路其岐維西有江湍流其枝伊此之懷  
復彼之思莫知所之我心孔哀昔我來思狐裘披披今  
我何為絺綌有淒譬彼行驥有繫其馳言提其袂載泣  
歔歔相彼鳴琴匪絃伊絲哀於塗人宜莫我知聖或弗  
濟伊命也而命也如茲我行其隨

送劉士幹知事赴湖廣省掾

衆羽之差差彼翰而鵠衆趾之離離我獨于夔夫乘而  
往我徒于追波濤洶洶則匪于江彼陸康莊則舍而杭  
我聞瞶瞶我視于盲爾牽于驅爰馬其駒爾行徐徐於  
余焉居我有旨酒聊樂與娛

送章子端調制東奏差

維山其阻維水沮洳孰來予蘇使君之車岵則有阪使  
車無反沮洳有衍伊澤斯遠維澤伊何孔碩洋洋我攸

樂康使車彭彭維驂在隅弗疾其驅彼華紆徐維章子  
之裾維山斯岵維水有許章裾楚楚實獲我所楚楚者  
衣肅肅者儀亦永其依我逸以敖娛

甘雨昨日足

甘雨昨日足今日豈不遊文漪散清沼綠樹未驚秋步  
出西郭門浩浩江漢流危檣隘川浦乃有遠人舟江租  
赴海漕驚沙無定漚號呼走羣吏肉食懷鄙謀及時不  
歸耕卒歲何用周悄悄綠髮子還家多白頭為農極凋

瘁猶用苦誅求

送趙有章教諭滿還郎浦

昔在秋浦還我行淩浩渺尋君郎川宅相逢武林道君  
顏日方滋我髮初未皓及茲陵陽見顏髮非昔好故心  
無淺交論詩有深造兩意正云云遠別何草草長恐重  
見日復此同衰老相知在久要良用豁懷抱

竹山

離離鳳食幹縣互亘脩巒君子懷靜儀虛貞媚蒼寒靈

厓發潛穎崇苞閱幽盤筮鄰從蔣詡永結求羊歡

同縣尹張志道徵士黃觀復陰秀才燕集六縣校

官葉仲庸池上分韻

二首

江水秋未清林暉午能碧相忘散亂坐幸老談笑劇以  
君久寒羶且爾暫暖席同心勿辭飲況有陶彭澤

王闕不注官從天得長假年衰豈能高老坐不許下新  
秋席為展欲夕尊未罷誰揮魯陽戈請駐羲和駕

次韻鄭復初錄事秋夜

涼涼秋夜深時露沾重衣志士不在飽詎復懷饑啼  
姑怨衰叢煥景淒已微屈父從遺則宋玉有餘悲馴致  
諒以道爾亦安爾為

寥寥秋夜高時物得其心榮華無終玩衰悴遽相尋微  
月流西極東溟足幽陰客為哀商奏絃促憂思深揮置  
各就寐已亡人與琴

快翁上人還吳中

秋江夕雨霽微涼生綵衣雲滅青宇空北鴻衆已飛鴻



飛向南去而我獨不歸我歸復何所長蛟臥寒浦將擾  
東海龍且騎南山虎南山虎白額具區濤可慕題詩悼  
夫差具禮謁泰伯麋鹿猶故臺草青霜未白亦知舊鄉  
好奈何懷遠道佛國烟霞深錢塘早晚到靈鷲天竺來  
虛閣乘飛嶠白猿宅幽深祇許湖僧叫憑君言許由搢  
策北峰頭月中下桂子脚底天香浮忽望凌霄道餘杭  
第幾橋

題句容趙氏松磎堂

愛客趙公子春登松磴堂展席翳長蔭臨流進餘觴陽  
漪動五色天聲散幽篁無謂山笛詠此樂殊未央

題秋江晚渡圖

白雲在青山紅葉爛無數亦有冬青枝長松共如故茅  
堂當樹間江光澹凝素扁舟不可呼誰令汝來暮

題昭君圖

曲逆老失計婁敬因自侯深宮如花人遠嫁龍沙頭龍  
沙萬里遠遠嫁不復返長思漢宮中淚痕日在眼淚眼

不可止嬌姿看轉美琵琶寄深怨繁聲紛在指

題畫馬為方遠上人賦

上人超世資脫然了無為猶有愛馬癖或比道林支天  
馬由來出天池西大宛國乃有之房星寫神孕龍烝雄  
志倜儻精權奇飛行滅沒電莫追空塵留煙不得窺月  
氏之子那敢騎漢武遠慕穆天子欲躋崑崙遊具茨遣  
使先開玉關道鳳頸虎翼初就羈王良造父死已久當  
時不知馭者誰唐人為馬置馬監奚官果是何物兒沉

復教之作馬舞跪拜起伏取笑娛伏仗能鳴輒引去俛  
首低摧青絡絲欲從駕駘服轅下局促動遭筭策施非  
徒喪志失天性病骨瘦柴如宛雖所以韓幹為画肉不  
忍神駿成凋羸大漠茫茫天作屋饑斲飽臥驕且馳蒲  
梢蕭颯輕風度首宿參差新雨滋胡為束縛對廝養長  
嘶無聲情內悲

送孟久夫遷內臺掾

陽烏本是日中物下來古柏棲冰霜南枝不如北枝好

北枝近日揚清光  
揚清光散朝彩鳴鳳高岡久相待  
天涯亦有鴻鵠羣  
莫使冥飛向雲海

寶鴨曲

銅池織風翠波躍  
睡足暖煙饑不啞  
重簾未厭雲水姿  
華屋清深寄閒絕  
生硃剝花紅錦翅  
枯咽半溼薔薇水  
寶燈夜縣琉璃光  
恍若淡在滄浪裏  
方筵慢舞得嬌嬈  
指痕膩染羅紋細  
就中恐有絕纓人  
誤識韓郎衣上氣  
古聞烏化之言  
豈虛語願學飛仙作雙去

題劉堯輔觀瀑圖

劉侯校書天祿罷向人輒作山水畫長巒老樹翠蓋敲  
轉瀑崩巖練花瀉玄冠白袍問子誰濠梁漆園忘世者  
京都塵起碧於雲炎洲瘴來疾如射揮毫定憶龍河上  
挾颿久睨匡廬下

王將軍歌送瑞卿之荔浦巡簡

青天白日散五雲酒酣起別王將軍嶺右湘原五千里  
君恩如天無遠邇百丈牽船上湘水蒼梧九疑雲旖旎

荔浦更在雲南頭砦中小官君莫愁生猺亦是天所產  
賦予五性為人儔渠豈不知官好惡怒則猖狂喜還樂  
近日大官虎噉之骨肉可羹髓可酪我官我強民爾弱  
是乃不堪兇性作前年道州殺人去太守萬戶走無路  
賊去官歸歡聚醕彼亦那知有其故將軍舊是廣東使  
屬州被患往相視此迹彼情知久矣今官況是猺之方  
山巖迫小官無房未足展仁化但用謹備防出入買賣  
無相妨往來見之等尋常殷勤趨庭使下拜喻以天子

仁聖臣忠良

送黃學錄歸番陽

有番之山嵯峨而嶽寄連峰結絡如旛旗或為齒齒芙蓉枝或似長人善鬚眉高冠大服佩委蛇或似蒼虬奮角鬐下赴巨浸長雲披九江彭蠡繞其側波濤盪擊而絲彌蒼蒼斷嶼如落星點綴碧落影倒垂行人裹糧備爨炊片時竟月不可期山中美茹多紫芝山中之人歌自怡



題稚川山水

江光如空山在天好風佳日散晴煙綠陰成蓋崖樹連  
野橋楊柳亦娟娟擔簦之子何促速況有荷杖當我前  
茅堂獨坐豈待客或者傲兀忘流年又疑浣花溪上叟  
索句未得掩兩肘對樹不語胡為然將非得詩不得酒  
耐可有酒無詩篇荷鍾歸向南山田陶公種秫五十畝  
往往為酒愁無錢

送秦元之赴太禧同僉

君家好兄弟聖主自知之周爵推秦仲虞官舉伯夷萬  
方天浩蕩五彩鳳威蕤宣室虛前席蒼生屬論思

金陵送人還武昌

相送白鷺洲因思黃鶴樓遙觀鄂王蹟重起禰生愁西  
上不可得東關曾獨留江邊趙佗石歲月但空流

題程先生西行集後

峽東水如箭已行船上天亂離藁葬後衰老秣歸邊手  
把西行集心追北上年東風故山淚落日灑江煙

登高分得疊嶂

遠近不可數  
淡濃渾自成  
人煙諸崦隔  
鳥道半空橫  
日夕黃微映  
江寒碧倒生  
憑高共臨眺  
憶得在宣城

送李御史

南臺鐵冠舊  
西府繡衣新  
吏部冰霜曉  
皇家雨露春  
三苗蠻作俗  
八桂嶺為鄰  
虞帝猶遺廟  
殷勤薦渚蘋

送賈西伯

西風苜蓿花  
南客又移家  
此道寧無用  
吾生未有涯  
峰

青宜霽日潮白逆江沙猶憶南樓夜吹簫度歲華

送張克讓

秋花白露芹鄉郡萬山雲官冷難為滿囊空政喜聞灘  
船牽月上嶺路入閩分有客來書辟青霄記雁羣

送王伯庸赴石埭板官

先生官已冷縣僻冷於官坐席嵐歸潤琴堂月過寒奇  
峰花作朶幽瀨玉為湍所喜無迎送高吟寄碧瀾

送客

馬帳朋方集麟經講未殘幡然懷故里誰此障狂瀾黃  
卷秋繁短青羶夜榻寒好將池草句題與惠連看

送人省親

子仕親亦喜子歸親更歡江湖片帆遠風雨一羶寒沙  
鳥行秋渚江豚拜午湍莫看松桂色容易厭時官

送翟彥敬陞中臺察院掾

名彥登烏府清門可雀羅辟書催北上行李及南訛天  
濶涼雲積江明暑雨過東門羣掾集更起續離歌

新寺和張仲舉兼次韻

天宮兜率下崔嵬結綺交疏面面開地勢周圍龍虎國  
鐘聲疎應鳳凰臺鼎湖仙去秋遺劒笠澤僧歸夜渡杯  
千騎巡街羣樂動五雲深處御香來

雁門送楊仲弘姪士耕歸龍泉

江迴彭蠡天逾碧路入臨川山復蒼令尹先為武進縣  
絃歌况逢君子鄉黃禽雙啼白日靜綠草自動春風香  
巾車數問虞夫子未慙元亮在柴桑

越州景德寺鏡清方丈題醉仙岳麓圖

鏡清方丈見岳麓堂虛咫尺行江潭樹木連霄巖影濕  
樓臺隔日水聲酣皇英雙騎龍上下蒼梧九點天東南  
道人得我千古意復遣老夢登雲龕

送美上人歸臨川

白雲不生華蓋峰青天淨倚碧芙蓉上船不記日多少  
到寺更行山幾重木客試人騎出虎淵靈求法脫為龍  
莫貪石室跣趺穩偏長松門薜荔封

次韻荅惠長老

棄為狂士幸相容敢向明時歎不逢皎月近人間傍水  
白雲邀客更登峰百年耳厭咸陽犬千載神交劒浦龍  
車馬滿街門映燭夢魂初熟蔣陵鐘

九月一日遊昭亭

山色汀光帶近郊道傍楊柳舞寒條半生九日黃花酒  
多在西風白下橋千里客遊仍暮景異鄉人事又今朝  
老來未遣登臨懶盡醉東家綠玉瓢



寄謝子木

秦贅誰徵夢  
年年漢官倉  
氏豈淹賢  
荒涼秋浦時  
時酒彷彿番江夜  
夜船湖海客  
身皆暮齒家  
山兒蕨等春拳  
何時與和歸來賦  
白石黃沙未有田

寄題道吾山聞禪師竹院

道吾竹院芙蓉下  
老子藤牀翡翠深  
過雨雷霆龍捧闥  
滿天風露鶴當林  
此君靜對了不厭  
諸老清談亦許尋  
他山祭酒聞還出  
何人載歌金玉音

送僧遊廬山 二首

十八社人五老邊香爐紫煙誰為然山光水影江行日  
風靜浪平船在天故里今逢霞外客孤篷曾坐月中禪  
清吟一為浣塵土宛對三梁看瀑泉

廬山東南山水多石梁顛倒挂銀河仙燈夜半天人落  
佛屋春深海客過五老芙蓉還好在陶公楊柳定如何  
布帆又起江湖興應道西風動薜蘿

寄題金鵝泉石軒

金鵝泉石有深趣黃鶴仙人曾獨來巖雨溜雲青玉瀉  
海天澄日碧蓮開山翁宴坐秋簾靜野客倦遊溪櫂迴  
幽徑依然生藥草他年從此入天台

題王元章梅

三年不見王徵士一見梅花如見人風致山陰頻夢夜  
雪晴江上又逢春毫端只作尋常寫意度真同造化神  
聞道耶溪新買宅想栽千樹作比鄰

送清涼寺友上人歸永嘉

江心舊作野客宿石頭今逢開士歸半夜落潮隨樵發  
十年殘夢逐雲飛相看接手話鄉里獨老忍淚沾裳衣  
新春亦有還家願會過石室推煙扉

次韻具菴送湛淵上人永喜省師

早年為客曾遊處今日題詩卻送僧  
珠箔濺巖看雪瀑寶窗緣塔見天燈  
金仙爛熳開銀界玉女嬋娟倚翠層  
禮罷阿師窮勝討諸峰歷歷漸攀登

題李息齋枯木竹圖

霜柯洞庭寒露葉渭川冷幽人美清夜獨寫秋燈影

賦山上松送常上人

松生在山上垂柯蔭其下人生苦別離念此歲寒者

元宵雨雪

銀燭春光玉雪霄翠簾歌管思寥寥羅浮洞裏花如織  
誰立寒香背小橋

馬德昭席上賦

江上重逢鄒大娘桃花紅嫩染纖裳蔓青溪上曾相見

猶記胡麻飯顆香

賦蕙花次韻岳上人

香滿松房夜月虛  
紫蕤縣露泣方諸  
湘魂故惱維摩定  
起和離騷掃壁書

酒間贈賈西白

思入東風白雨邊  
暮雲春樹兩茫然  
不因絳灌輕新進  
未必長沙識少年

王冕

字元章諸暨人本田家子長七尺餘儀觀甚偉通春秋諸傳試進士舉不第即焚所為文讀古兵法衣履舉止詭異自放見者目為怪民嘗遊燕京台哈布哈薦以館職笑謝之工於畫梅用臘脂作沒骨體貴游爭購之因題梅作絕句幾罹詩禍逃歸隱於九里山明初幕府平浙得免將授以參軍一夕卒

水仙圖

寒風蕭蕭月入戶渺渺雲飛水仙府仙人一去不知所  
池館荒涼似無主江城歲晚路途阻邂逅相看顏色古  
環珮無聲翠裳舞欲語不語情悽楚十二樓前問鸚鵡

滄海桑田眯塵土王孫不歸望湘浦芳草連天愁夜雨  
對景吟

濕雲不飛山雪滿越王城頭鼓聲短曉來溪上看梅花  
虎跡新移大如椀老烏縮項如凍鷺呼羣強作嬰兒啼  
紅桃翠柳眼欲迷舊時紈袴今塗泥淮北千里無煙火  
淮南近日多軍馬寸薪粒粟不論錢行客相看淚盈把  
如何五陵年少郎賣田去買青樓娼吳歌楚舞不知夜  
歸來也學山翁狂明朝酒醒入官府方知不是城南杜



落花風急雨瀟瀟  
索寞無言面如土

痛哭行

雨淋日炙四海窮  
經綸可是真英雄  
岐豐禾黍泣寒露  
咸陽草木來悲風  
京邦大官飲酒肉  
村落飢民無粒粟  
東魯儒生徒步歸  
南州野老吞聲哭  
紛紛紅紫已亂朱  
古時妾婦今丈夫  
有耳何曾聽韶武  
有舌不喜論詩書  
昨夜虛雷槌布鼓  
中天月破無人補  
休說城南有韋杜  
白壁黃金天尺五

送无咎遊金陵兼東丁仲容隱居

長松撼空風怒號前門大水推斷橋山中坐雨六十日  
不知野草如人高今晨出門天氣好眨眼忽驚春事老  
楊花散作雪滿溪送客俄然動懷抱金陵六朝古帝都  
古時風景今何如珊瑚無根土花碧露團玉樹生流珠  
江上無人隔塵土丹鳳不來孤燕語上人脫灑無滯留  
底用登臨重懷古世人往往乘險機老我白髮無能為  
道甫問訊丁令威有鳥有鳥何時歸

猛虎行

去年江北多飛蠹今年江南多猛虎白日咆哮作隊行  
人家不敢開門戶長林大谷風颼颼四郊食盡耕田牛  
殘膏賸骨委丘壑髑髏嘯雨無人收老鳥銜腸上枯樹  
仰天烏烏為誰訴逋逃茫茫不見歸歸來又苦無家住  
老翁老婦相對哭布被多年不成幅天明起火無粒粟  
那更打門苛政酷折髀敗肘無全民我欲具陳難具陳  
縱使移家向墨市破獍獠猢猻喧成羣

勁草行

中原地古多勁草節如箭竹花如稻白露灑葉珠離離  
十月霜風吹不到萋萋不到王孫門青青不蓋讒佞墳  
游根直下土百尺枯榮暗抱忠臣魂我問忠臣為何死  
元是漢家不降士白骨沈埋戰血深翠光激灑腥風起  
山南雨晴蝴蝶飛山北雨冷麒麟悲寸心搖搖為誰道  
道傍可許愁人知昨夜東風鳴羯鼓髑髏起作搖頭舞  
寸田尺宅且勿論金馬銅駝淚如雨

蝦蟆山

春風吹船着牛輓

牛輓潭在蝦蟆山下

扶藜直上山之脊山上老

石怪且頑皮膚皺散苔花碧我來不知石有名拊摩怪

狀心亦驚野人指點為我說此物迺是蝦蟆精古昔曾

偷太倉粟三百餘年耗中國天官燭其陰有毒敕丁破

口劉其足至今突兀留山丘雨淋日炙無人收樹根穿

尻蛇入肚老鴉啄背狐糞頭牧童時時放野火耕夫怒

擊樵夫剝自從殘墮不能行見者唾之聞者罵蝦蟆蝦

蟪蛄非令僕無功那竊天之祿如今蝦蟆處處有天官何  
不夷其族致令驕氣吹風腥干霄上食天眼睛百蟲啗  
盡心未已假作鼓吹怡人情三月江南春水漲紆青柁  
紫爭跳浪漁父持竿不敢言獵犬布弩空惆悵黃童白  
叟相引悲田中更有科斗兒

村居

避世忘時勢茅廬傍小溪灌畦晴抱甕接樹濕封泥乳  
鹿依花臥幽禽過竹啼新詩隨處得不用別求題

寫懷

世情多曲折客況自堪憐  
聽雨愁如海懷人夜似年  
草肥燕地馬花老蜀山鵲  
冷澹無歸計蒼苔滿石田

晚眺

密樹連江暗殘陽隔浦明  
不知秦塞遠殊覺楚天明  
故國人在荒城鳥亂鳴  
徘徊吟未已搔首忽傷情

次韻答王敬助

西圃餘薑蔗東皋足稻粱  
今年誠有望吾計未全荒  
倚

仗停吟久看雲引興長鄰家新釀熟同醉菊花旁

泊瓜洲

落日大江秋淒涼覺底愁逆潮攻敗壘荒樹入沙洲險  
固空餘迹清平且壯遊不須腰十萬明日上揚州

黃牛山

招提萬山底古屋蔽煙霞密竹先秋意長藤過夏花繁  
陰沈雨脚清響激雲牙老袖眉如雪相逢話作家

齷齪



齷齪寧堪處卑汙奈此逢看人騎白馬喚狗作烏龍濯  
濯河邊柳青青澗底松待看天氣好應得露華濃

漫興  
四首

草木何搖撼工商已破家饒州沈白器勾漏伏丹砂吳  
下難移粟江西不運茶朝廷政寬大應笑井中蛙

壬辰天意別春夏雨冥冥雲氣何時斂江聲未得停書  
生憐白髮壯士喜青萍昨夜登西閣悲笳不忍聽

處處言離亂紛紛覓隱居山林增氣象城郭轉空虛俠

客思騎虎溪翁只釣魚諸生已星散那得論詩書

干戈猶未定鞀鼓豈堪聞憂國心如醉還家夢似雲關  
山千里遠吳楚一江分朋舊俱零落空嗟白鳥羣

偶成

四月八日風雨歇放翁宅前湖水高典衣沽酒亦足醉  
騎馬看花徒爾勞海國尚聞歌蔓草山陵誰與薦櫻桃  
元龍本是無能者後世謾稱湖海豪

歸來

頭白歸來驚面生東家西家知我名  
友朋投老漸凋落  
兒女向年俱長成  
野梅開花尚古色  
山風吹雨墮寒聲  
最喜溪翁會真率  
濁酒過牆香滿罌

寄徐中幾

僦得城樓枕臥龍  
儲無儋石是英雄  
吟詩不媿杜工部  
乞米或如顏魯公  
蘭省異於霄漢上  
草堂却在畫圖中  
故人相見無多論  
笑指松花落晚風

山中答客問

人間塵土苦歌煩  
林下清風六月寒  
夜半酒醒方脫屐  
日高眠起不簪冠  
坐看遊蟻巡危磴  
靜聽閒花落古壇  
老我自無軒冕意  
尋常豈是傲時官

題金陵

賞心亭前春草花  
賞心亭下柳生芽  
收功謾說韓擒虎  
亡國豈由張麗華  
江山萬古足登覽  
豪傑幾人來歎嗟  
野老相逢閒指點  
六朝宮闕盡桑麻

送欽上人

石頭城下五更秋，高挂雲帆得順流。  
鐵甕緣江卽東府，瑤花隔岸是揚州。  
作家相見本無語，在客別離殊有愁。  
後夜相思好明月，老夫乘興獨登樓。

閒題至元舊事

樓臺矗矗帶山河，金玉重重是帝家。  
雲合紫駝開虎帳，天連青草入龍沙。  
春風小殿看飛燕，夜雨重城散落花。  
甲乙流蘇仙夢好，莫教方士問丹砂。

金陵懷古避亂作

壞牆幽徑草青青何處園林是舊京  
海氣或生山背雨江潮不到石頭城  
英雄消歇無人語形勢周遭夕照明  
回首長干思無限水風楊柳作秋聲

謾興 三首

隱几看山與世違當門種竹亦無機  
五更驟雨隨風過滿眼落花如雪飛  
每為註書消夜燭亦常沽酒典春衣  
今朝急報任公子昨日蒼苔滿釣磯

關中險固馮三輔隴右勾連接四川  
簇簇樓臺臺縣日月

盈盈花草爛雲煙  
颺回海上沙飛雪  
雨足江南水拍天  
可笑華山陳處士  
風流文彩却貪眠

青山隱隱帶灤河  
金碧光中望馭娑  
五穀不生牛馬盛  
二儀殊候雪霜多  
打圍陣合穹廬轉  
警蹕聲傳御駕過  
漠漠黃沙天萬里  
壯心未解說風波

悼止齋王先生

三月燕山聽子規  
追思令我淚垂垂  
雖然事業能經世  
可惜衣冠在此時  
霜慘晴窗琴獨冷  
月明秋水劍雙悲

山河萬里人情別回首春風說向誰

異鄉

東山西山生白雲異鄉那忍見殘春野蒿得雨長過樹  
海燕隔花輕笑人每是閉門疎世事何曾惜酒惱比鄰  
過從時有相嗔怪不解潛夫意思真

雨中

江南江北水滔天羈客相逢亦可憐坐覺青山沈席底  
行驚白浪上窗前鶉鳩銜草栖危塔鷓鴣翻飛浴敗船



轉首蠻村寥落甚絕無茅屋起炊煙

秋興

鼙鼓嘈嘈夜撼山霓裳歌舞出人間雲圍環珮沈斜谷  
風斂旌旗入劔關躍鑠野翁掀雉尾跳跄山鬼覲龍顏  
書生豪放成何事徒步歸來供奉班

金水河春興

二首

方州何處見繁華儘好當時富貴家慷慨喚來黃字酒  
丁寧將出紫簾車春風嫋嫋穿楊柳小雨冥冥度杏花

沈醉歸來不知夜又傳清響按琵琶

金水河邊柳色新玉山館外少沙塵琵琶未必能愁客  
鸚鵡如何錯喚人翠袖錦襜馱白馬落花飛絮開朱輪  
人間天上無多路只隔紅門別是春

梅花 十首

五雲縹緲隔蓬萊仙子吹簫月下回轉眼不知春幾許  
霜花如雪滿瑤臺

羅浮月白海無塵玉樹瓊林處處春半夜禹陵風雨作

屋梁飛動欲生鱗

玉雪玲瓏瘦影重不同桃李媚春風十分清致無人解  
猶在舊家池館中

月明海底夜無煙恰似西湖雪後天清氣逼人禁不得  
玉簫吹上大樓船

獨鶴高飛雪氣濃梅烟清淺月朦朧一聲簫管歸何處  
人在瓊樓玉宇中

春風一笑玉無根雲散空窗見月痕半夜鶴歸詩思好

清香吹滿水南軒

吹徹瑤笙鶴未還  
小橋流水碧潺潺  
夜深夢醒推窗看  
白月無痕雪滿山

溪谷冰霜春到遲  
老夫長夜只吟詩  
憑誰說與中朝士  
此是江南第一枝

海雲初破月團圓  
獨鶴歸來夜未闌  
一片笙簫湖水上  
玉妃無語下欄干

和靖門前雪作堆  
多年積得滿身苔  
疎花箇箇團冰雪

羌笛吹他不下來

王元章在燕門賦此詩有目之為刺時者將捕之以逃免

墨梅二首

老仙醉吸墨數斗吐出梅花箇箇真相見莫嫌顏色異  
山林別是一般春

我家洗硯池邊樹朵朵花開淡墨痕不要人誇好顏色  
只留清氣滿乾坤

紅梅七首

顏色雖殊心不異謾隨時俗混繁華清香吹散乾坤外

不是尋常桃花

白日遲遲照窗戶  
深院不知春幾許  
紫簫聲轉香風回  
隔簾踏動鰼脂雨

洞天窅窅無人到  
白日丹光出樹林  
仙子竟忘餐玉法  
笑迎春色綠雲陰

彩鳳穿花啄石苔  
玉窗瓊戶紫烟開  
山人不說羅浮夢  
卻憶玄都觀裏來

玉妃步月影毵毵  
燕罷瑤池酒正酣  
半夜不知香露冷

春風吹夢過江南

仙子雲中駕鶴歸翩翩霧佩曉風吹玉肌輕染胭脂色  
恰似羅浮夜醉時

玉骨清癯怯素妝春風一醉九霞觴綠房午夜嬌雲暖  
不夢梨花夢海棠

應教題梅

刺刺北風吹倒人乾坤無處不沙塵如何凍死長城下

誰信江南別有春

下二句一作清高只有老  
梅樹照水開花箇箇真

劉炳

字彥昂鄱陽人其父名斗鳳用虞揭諸公薦為翰林應奉未上而卒彥昂雅志汲古所著詩集則危素宋濂序之以為有謝康樂韋應物之風而楊維禎亦稱其能兼諸體云

憶園廬

種園在東皋草荒瓜蔓長日落秋樹涼褰衣獨還往時逢野老憩自足田園賞沿溪暝忘歸古寺煙鐘響

行路難

奉君五綵鳳凰之綺幄七寶鴛鴦之錦牀博山氤氲之



冰屑金盤沆瀣之瓊漿春風無情不相待朱顏綠鬢年  
年改姑蘇臺上鼓如雷四時歌舞百花開當年意氣今  
安在鬼火如燈秋似海

燕子樓同周伯寧賦

寶瑟凝歌繞珠箔流蘇結帶黃金索翠紅香裏宿鴛鴦  
春風人間無此樂杏梁塵暗麝蘭篝黛瑣眉峰掩畫樓  
燈殘枕冷梨雲斷秋雨人間無此愁

寒夜怨

月來愁亦來心憐月去愁應改樓高月轉遲停箏坐倚  
熏籠待月落卻成眠誰知枕冷愁仍在

烏夜啼練高同賦

城頭烏啼風瑟瑟露滴銀牀秋月白錦屏金屋醉西施  
歌長漏短銅壺窄回首繁華散似雲姑蘇臺上鹿成羣  
令人卻憶烏啼月此月還應照後人

河中之水歌寄劉子雍程伯羽

河之水向東北洛陽女兒好顏色八歲画娥眉九歲自

裁衣十歲學識字十一拋梭攀錦機十二刺繡紋十三  
能睹棋十四彈箏篴十五纔上頭鬢偏斜戴金團鳳臂  
弱不勝珠絡韝羅幃睡起傷春瘦画閣妝成對日羞十  
六妖嬈解歌舞容色比花花不語扶持生怕下階行三  
寸春嬌雲一縷行媒將聘嫁周郎桂柱蘭堂錦作房比  
翼鏡奩妝玳瑁合歡裙帶繡鴛鴦茱萸露濕珊瑚枕蘇  
合香薰翡翠牀生憎啼鳥催春去不忿啼鳥怨夜長杯  
成連理生何幸釵合同心死不忘眼前節物年年度只

恐芳華不相顧南陌芙蓉午夜霜東園桃李三春雨君  
當為妾秉燭遊東海為釭槽作丘妾當為君金縷謳春  
風莫遣人間愁

來日苦短黃子邕同賦

來日苦短去日苦長人生如朝露不如笑歌置酒臨高  
堂春風不到九泉下盛年一去難再芳老行及之徒悲  
傷

鬼妾行

閨中女兒白如雪縣官娶作專房妾黃金翠羽繡羅襦  
枕邊誓死心不渝豈意榮華草頭露好似青藤倚枯樹  
一朝樹倒藤無依垂垂哀哭牽腸肚依稀無復半年春  
新官到任遣媒人鴛鴦錦帳重還整鸞鳳金釵依舊新  
洞房更結叮嚀語却說新情多勝故自怨飛花逐水流  
為憐嬌蝶無鶯妬傷心認作主衣裳窗前臨鏡照新妝  
青銅欲待銷磨盡幾度春風幾斷腸

邯鄲行

白日下叢臺野曠秋風早不聞歌吹聲空遺往來道傷  
心卻憶平原君墓上牛羊蹋荒草

寒食客秦淮憶舊

去年寒食長途客桃花落盡梨花白今年寒食客秦淮  
杏花李花無數開東風凋殘白羽箭落日獨倚黃金臺  
緇塵蕭騷吹病目破帽烏靴泥漉漉藜杖東山弔謝安  
悵望飛雲仰天哭淒涼心事更誰憐綠綺可以調絲絃  
子期已矣伯牙死高山流水空荒烟王孫不歸芳草暮

解衣沽酒驅愁去誰言一醉可消愁酒入吾腸肝膽露  
便擬揚帆折木津仍期挂劍扶桑樹志士長歌溝壑憂  
功名百歲等浮漚雨晴浪暖沙豚上載酒滄江弄釣舟

寄徐宗周兼楊與文阮宗泰

李家池頭去年別大風揚沙天欲雪贈我鯉魚三十腮  
楊柳穿來帶寒血今年八月芝山樓我欲少住君不留  
蹇驢落日冒秋暑鬢絲汗溢黃塵流近過阮公茅屋底  
說君沈疴幾不起九月十月方離牀強健近來差可喜

相望片雲老石山來往每嫌消息艱斯文凋謝少知己  
恨不連牆相往還卻憶少年從義日聞雞不眠追祖逖  
殺敵風吹寶劍腥打圍雪壓雕鞍濕諸葛曾懷漢室憂  
包胥亦有秦庭泣投老相看四海清風昔患難同離情  
歸來廬井有桑梓拜掃丘墓除榛荆傳家書在晚還讀  
負郭田深春自耕愛君窗前脩竹大聽雨何時對牀臥  
卻扶藜杖過楊兄使酒怕渠將罵坐氣概頗與常人殊  
天經地軌談陰符黃岡溪頭懶垂釣未央殿前思上書



功名定有國士報肝膽好將民瘼蘓黃金臺高一千尺  
白日橫飛虎生翼呂望八十方致身五十富家朱買臣  
時來勲業自有待豈得甘作漁樵人

題呂氏園草堂朱雀橋

何處銷殘暑城南茅屋幽晚煙將野色春樹帶江流愛  
竹呼兒種耽杯與婦謀生涯成老圃不是故時侯

郊居雜興東陳遂良

風雨行人少柴門午尚扃土花沿砌碧山果墜枝青病

眼耽書癖衰顏託酒星經邦方上武寂寞抱遺經

早春呈吳待制

上林春早陌塵香紫禁觚稜射日光新綠御河搖柳黛  
小紅宮樹試桃粧山連曉氣蟠龍虎臺枕東風憶鳳凰  
心折故園幽興獨尋僧看竹過鄰牆

寄許永明公寃昆弟得夫先生

少年曾共請長纓雲壓旄頭劍氣腥諸葛有心扶漢室  
包胥無淚哭秦廷九鰲夜徙龍沙黑八駿秋迷鳥道青

一別關河俱白首斷腸煙樹滿長汀

燕城懷古

廣寒宮殿玉為樓萬歲鰲峰壓九州番國梵僧青鼠帽  
天魔宮女綵龍舟鈎陳蒼闕山南拱太液紅橋海北流  
唯有盧溝溝上月年年鴻雁不勝秋

次秋日韻奉汝弼叔

二首

墨池秋淨水痕澄曲几焚香袖手憑霜煞柳條清栗里  
雨荒瓜蔓覆東陵戰餘趙壁車還列說下齊城軾獨凭

因憶少年隨驃騎西風笳鼓醉呼鷹

三徑歸來菊未荒半凋楊柳弄春涼銀屏紈扇題秋句  
金鴨羅衣換夕香老憶風雲趨北闕夢無花月待東牆  
狂遊尚記秦樓別翠袖紅絲拭淚行

秋夜對月寄汪宗彞

三首

宮樹涼生絳闕玉階影轉銀河曾侍梨園供奉夢魂猶  
託笙歌

辯舌曾歸白壁酬恩盡散黃金范叔綈袍誰念悲歌自

鬢瑤琴

薄枝寧為鷄口雄心每借魚腸敝矣布袍雙袖御爐猶帶天香



宋元詩會卷九十三

欽定四庫全書

集部

宋元詩會卷九十四

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣王鍾泰

謄錄監生臣史元善

欽定四庫全書

宋元詩會卷九十四

兵部主事陳焯編

丁鶴年

字鶴年回回人穆爾丹官武昌因家焉鶴年遂以  
丁為姓其長兄吉雅摩迪音字元德次兄鄂拉寶克丹  
字允中至正間並舉進士鶴年詩典麗清醇天姿  
既高而學力足以副之一時詞彥罕有出其右者

風泉清聽

為文禪  
師賦

幽棲空谷中石室如懸磬坐閱造化機動靜互相勝風

生萬籟隨雨過百泉應蕭蕭亂疎鐘泠泠隱清磬虎嘯  
山月昏龍吟海波靜上人謝聲塵悠然入深定喧寂兩  
俱忘是乃名真聽

歲晏二首

歲晏百憂集獨坐彈鳴琴琴聲久不諧何以怡我心拂  
衣出門去荆棘當道深還歸茅屋底抱膝梁父吟  
歲晏百憂集擊節發商歌商歌未終調淚下如縣河故  
鄉渺何許北斗南嵯峨有家不可歸無家將奈何



感寓 三首

宇宙忽空濶飲馬萬里流平生負兩眼及此行寓州天  
清健鶻運木脫饑鷹投長風吹海雨濯我紫綺裘相逢  
半遊俠把酒髯如虬慷慨說史記歷今山川秋向來衣  
帶水目短河無舟

西風桂花落我上天台山仙子扶我手冷然蒼水環乘  
鸞者誰子飛烟渺難攀三生此遊戲弄影銀河灣空山  
忽飛瀑四顧鳴潺湲長揖馬子微此豈非人間

船頭書千乘船尾酒百壺酒盡書在眼落月如明珠忽  
悟八陣法縱橫如河圖惜哉經世士未有窺唐虞季子  
相六國所見惟陰符

胡節婦

一自失良人年年不見春常時折花處青苔滿行路即  
今垂老百事非篋中惟有嫁時衣姑終養子能成立望  
夫差勝山頭石

登北固山多景樓

風月無邊地，乾坤有此樓。  
城隨山北固，潮蹴海西流。  
眼界寬三島，胸襟隘九州。  
階前遺恨石，誰復話安劉。

幽期

何處赴幽期，青林白谷陞。  
谷虛秋氣早，林茂曙光遲。  
談罷風生塵，歌闌月在巵。  
謀身良自足，何補國安危。

春日海村

門巷絕輪蹄，春深綠草齊。  
風光不相負，泉石且幽棲。  
捲幔通花氣，移牀避燕泥。  
時時得佳句，自向竹間題。

涵清軒

為慈谿懋上人作

止水纔盈掬  
涵空有底寬  
玉壺秋影淨  
金鏡曉光寒  
落月斜沈白  
流霞淺浴丹  
上人方宴坐  
應向靜中看

贈李仙姑

何年萼綠華  
來降地仙家  
花擁青鸞節  
香隨白鹿車  
清輝迴雪月  
玄想結雲霞  
不赴瑤池宴  
桃開幾度花

送定海許縣丞

蛟門佐邑滿  
南去候庭闈  
雨露隨花綬  
雲霞避綵衣  
賢

聲今已著色養舊無違萬里滄溟月清秋作伴歸

慈谿歸隱

為馮子木  
大尹作

舊隱慈谿上歸休足自怡水翻琴上曲山送画中詩  
叢菊秋容淡孤松畫景遲依然對猿鶴無愧北山移

題筠軒

為定海胡  
處士賦

種竹遶前楹年深勁節成薄雲通雨氣清夜動秋聲  
魚豕空遺簡鸞皇合度笙往來三逕熟不負歲寒盟

病衰

病骨秋增痛衰容日減華  
臉霞憐竹葉鬢雪妬菱花  
往事嗟何及歸程望轉賒  
少年歌舞地此日屬誰家

故宮人

粉愁香怨不勝情  
強整殘妝對老兵  
別殿金蓮餘故步  
後庭玉樹變新聲  
眼穿雁字雲連塞  
夢斷羊車月滿城  
天上桃花王母去  
世人誰識許飛瓊

雪後泛東湖

雪後湖山玉作園  
小舟乘興弄清輝  
貪看月裏鸞回舞

不覺風前鷁退飛雲母屏空春閒寂水晶宮冷晚霏微  
仙家一笑乾坤老誰馭瑤池八駿歸

梧竹軒

為鳳浦方氏作

鳳鳥曾聞此地過至今梧竹滿丘阿政懷剪葉書周史  
卻恨翻枝入楚歌金井月明秋影薄石壇風細晚涼多  
中郎去後知音少共負奇材奈老何

存齋詩話云時作者已滿卷矣此詩

一出皆為飲

九靈山房圖

為戴先生賦

九靈別業何年到聊作新圖寄所思幽谷白雲晴窈窕  
高簷翠樹曉參差輞川已入王維画韋曲仍傳杜甫詩  
咫尺相望成萬里臥遊心事許誰知

二靈寺守歲

守歲山房迴絕緣燈光香爇共蕭然無人更獻椒花頌  
有客同叅柏子禪已悟化城非樂事不知今日是何年  
憂心悄悄渾忘寐坐待扶桑日麗天

暮春感懷



杜宇聲聲喚客愁故園何處此登樓落花飛絮成春夢  
剩水殘山異昔遊歌扇多情明月在舞衣無跡綵雲收  
東皇去後韶華盡老圃寒香別作秋

一作別  
有秋

奉寄九靈先生

花柳村村接海濱攜家隨處避風塵衣冠栗里猶存晉  
雞犬桃源久絕秦坐對青山渾不厭忘機白鳥自相親  
也知出處關時運豈但逃名效隱淪

寄定海故將軍邵公輔

往事浮雲杳莫攀壯懷未展鬢先斑不聞奉使通銀漢  
空見將軍老玉關故壘荒涼千騎盡滄溟浩蕩一鷗閒  
風塵隨處嚴訶止愁殺田間野獵還

贈李全真

玄元孫子玄都客汗漫長遊宇宙間黃鶴白雲迷鄂渚  
青牛紫氣滿函關袖中寶劍雌雄合鼎內金丹大小還  
不見吹笙王子晉秋來幾度駐緱山

兵後還武昌

避亂移家大海隈  
楚雲湘月首頻回  
歸期實誤王孫草  
遠信虛憑驛使梅  
天地無情時屢改  
江山有待我重來  
白頭哀怨知多少  
欲賦慚無庾信才

題昌國普陀寺

寺在寧波東南海島間  
即昌國州之故墟也

神鼇屹立戴崔嵬  
俯瞰滄溟水一杯  
積翠自天開  
罨画布金隨地起  
樓臺祈靈漢使乘  
槎到傳法  
番僧折葦來

若使祖龍知勝概  
豈應驅石訪蓬萊

按錢本此題原二  
首其次作警句云

三更日浴咸池水  
八月潮吞渤海天

知歸菴

為四明董氏作

袞袞紅塵未息機，斯人何事獨知歸。  
青山不辨將來計，白髮徒嗟既往非。  
谷口雲霞隨葛屨，沙頭魚鳥識荷衣。  
自慚潦倒江湖表，猶對旄丘賦式微。

樊口隱居

為武昌李均玉作

萬里雲霄斂翼回，挂冠高臥大江隈。  
春深門巷先生柳，雪後園林處士梅。  
翠擁樊山邀杖屨，綠浮湘水映樽罍。  
誰能領取坡仙鶴，月下吹簫共往來。

戲贈劉雲翁

千金不惜買新聲  
贏得風流老更成  
銀甕葡萄浮臘蟻  
金屏窈窕轉春鶯  
香凝宴寢頻開席  
花暗閒房合度笙  
夜燕未終賓客醉  
莫將明燭照華纓

錢塘懷古

錢塘佳麗冠南州  
故國繁華逐水流  
龍虎已消王霸氣  
江山空鎖古今愁  
吳臣廟冷潮喧夜  
宋主陵荒塔倚秋  
最是西湖歌舞地  
數聲魚笛散鳬鷗

武餘清樂為致仕尹將軍賦

汗馬功成即引年  
登山臨水小遊仙  
印紋久秘微生綠  
字韻新成盡入玄  
深造煙霞靈運屐  
浩歌風月鄂君船  
貽謀尚有孫吳略  
膝下時時課一篇

勉戴玄學

才名籍甚冠時髦  
愛爾青年氣獨豪  
千里共誇騏驥足  
九苞爭覩鳳皇毛  
月中把桂雲生履  
天上看花日映袍  
宦達每由稽古力  
夜深燈火莫辭勞

避地

避地長年大海東  
蕭條生事野人同  
春深耒耜孤村雨  
日落帆檣遠浦風  
那得文章偕隱豹  
聊將音問託歸鴻  
平生自恨無仙骨  
五色蓬萊咫尺中

卜居

木石為交不背盟  
卜居應得愜幽情  
雨苔蘸水溪魚上  
風葉墜階山犬鳴  
習懶已成忘盥櫛  
避喧漸遠絕逢迎  
義肥百戰收全勝  
特為耽詩太瘦生

題東湖青山寺古鼎銘長老鍾秀閣

手開樓閣貯羣經  
面對湖山衛百靈  
玉鏡夜寒通沆瀣  
翠屏秋淨倒空青  
避煙鶴起簷間樹  
行雨龍歸几上餅  
我亦逃禪雲水客  
便應蕭散共松扃

清勝軒

為姑蘇潤上人作

繞屋松杉手自栽  
重陰長日護蒼苔  
一溪窈窕花間入  
三徑參差竹下開  
夜半霜鐘寧假筵  
秋深月鏡本無臺  
主人定起焚香坐  
何處扁舟擢雪來



悼湖心寺上人

祇林一葉隕秋霜回首滄洲淚兩行  
几上殘經塵已暗篋中遺稿墨猶香  
雲迷圓澤三生石月冷維摩十笏房  
想像清容何處記寒梅幾點竹蒼蒼

逃禪室與蘇伊舉話舊有感

不學揚雄事草玄且隨蘇晉暫逃禪  
無錐可卓香巖地有柱難擎杞國天  
謾託丹霞燒木佛誰憐玉露泣銅仙  
茫茫東海皆魚鰲何處堪容魯仲連

夢得先妣墓

窮冬風雪正交馳，獨扣泉扃訪母慈。  
極浦空江泥滑滑，荒岡舊隴塚累累。  
那知恍惚魂歸夜，正是呼號淚盡時。  
孝格皇天吾豈敢，聊同烏鳥報恩私。

寄西湖林一貞先生

錦繡湖山世絕稀，東風不放賞心違。  
芙蓉楊柳臨清淺，佛剎仙宮繞翠微。  
画舫載春天上坐，紫騮馱醉月中歸。  
高情獨有林和靖，門掩晴空看鶴飛。

自詠 五首

一夜西風到海濱  
樓船東出海揚塵  
生慚黃歇三千客  
死慕田橫五百人  
紀歲自應書甲子  
朝元誰共守庚申  
悲歌撫罷龍泉劍  
獨立蒼溟望北辰

堂堂至正最多材  
萬國同文壽域開  
漠北諸生登第去  
越南計吏進賢來  
鳳韶九奏黃金殿  
鶴駕三朝白玉臺  
回首黃塵揚碧海  
五雲無處覓蓬萊

千官何處扈宸遊  
回首風塵偏九州  
黃竹雪深迷玉輦

蒼梧雲斷見珠丘，令威不盡去家怨。精衛豈勝填海愁，  
大禹胼胝天所眷。肯教綸邑久淹留。

六軍遙駐墨河濱，故國丘墟詎忍聞。露冷金銅應獨泣，  
火炎玉石竟俱焚。虞淵日暮無還景，禹穴秋深有斷雲。  
草澤遺民今白髮，憑高無奈思紛紛。

九鼎神州竟陸沈，偷生江海復山林。頻繁誰在隆中顧，  
憔悴惟餘澤畔吟。齧雪心危天日遠，看雲淚盡歲時深。  
百年家國無窮事，可得忘機老漢陰。

奉寄王宣慰兼呈九靈先生

別館新成足宴遊  
珊珊環珮總名流  
獨推南國為高士  
共識東陵是故侯  
天上鷺花三月夢  
人間春雨五更愁  
行藏盡付浮雲外  
爛醉豐年稼黍秋

山居

懶散形骸不自持  
黃冠聊束鬢邊絲  
頻來猿鶴渾相識  
久混龍蛇竟不知  
養拙最宜情澹泊  
全生深藉德支離  
看雲本自忘饑渴  
況有冰泉與石芝

逃禪室解嘲

久慕陶公臥北窗還從馬祖吸西江掃愁那用千金帚  
折慢惟瞻七寶幢日晏捲簾延疊嶂雨晴敲枕聽流淙  
周妻何肉俱無累祇有詩魔老未降

兵後還武昌

亂定還家兩鬢蒼物情人事總堪傷西風古塚遊狐兔  
落日荒郊臥虎狼五柳久非彭澤令百花今豈杜陵莊  
舊遊回首都成夢獨數殘更坐夜長

過九江追悼李子威太守

辦香遙拜九江城太守精神日月明  
叔姪並歸忠義傳江山不盡古今情  
潮回湓浦聲猶怒雲起爐峰氣未平  
生死總魁天下士丈夫端不負科名

次小孤山

峽束千雷怒擊撞危峰屹立壓驚瀧  
山聯廬霍朝三楚水落荊揚限九江  
鎮海重關當第一擎天孤柱故無雙  
珮環月夜知何處露濕蓬萊玉女窗

題西圃卷

為蕪湖辛  
順中作

坐閱桑田變歸為菽水謀聊從西圃隱少慰北堂憂  
月滄江曉鋤雲沃野秋新蔬和雨摘碩果帶霜收嘉樹  
巢烏鳥閒庭下白鷗管寧金不顧季路米應求千載誰  
同調東陵有故侯

過安慶追悼余文貞公

將軍匹馬入舒城擊賊頻煩訓義兵孝以保家忠徇國  
聚而出戰散歸耕園侔月暈全無隙捷振天威大有聲



遊說飛書徒間諜輸誠仗節愈堅貞雲梯屢卻妖氛豁  
露布交馳殺氣平千里荆揚憑保障七年淮海賴澄清  
山深楔榆殲還出江濶鯨鯢斬更橫外援內儲俱斷絕  
裹瘡飲血獨支撐天昏苦霧埋營壘日落陰風卷旆旌  
甘與張巡為厲鬼肯同王衍誤蒼生三千將士皆同死  
百二山河亦繼傾靜對風霆思號令遙從箕尾識精誠  
頌碑不愧詞臣色哀詔偏傷聖主情願為執鞭生不遂  
臨風三酹重沾纓

上明州太守茶子俊

還武昌遷葬告牒而作

漢江東抱楚江流先壠猶餘土一坏廟冷桐鄉耆舊逝  
田荒栗里子孫愁兵戈隔夢三千里霜露傷心二十秋  
荒隧天寒烏鳥下空林日落白狐遊碑焚斷石經時變  
盃出遺金有夜偷過客尚知來下馬僊翁誰復指眠牛  
擬從樊口遷京口遙別沙頭下石頭高士束芻思致莫  
故人惠麥久維舟已知多病垂垂老敢為常貧故故留  
為政幸逢宗正恕申情當念子平憂劬勞罔報生何益

存歿沾恩死必酬願及清明三月節一盂麥飯洒松楸

採蓮曲 二首

採蓮復採蓮下有孤鴛鴦秋花不結實夜夜守空房  
朝採並蒂蓮暮綰同心結不學綠楊枝含嚬送離別

迎大年椿上人不值暮歸偶成

東歸聞道已浮杯力疾逢迎日幾迴何處晚來成誤認  
風簾竹影月窗梅

竹枝詞

竹雞啼處一聲聲  
山雨來時郎欲行  
蜀天恰似離人眼  
十日都無一日晴

附  
吉雅摩迪音

鶴年長兄

貽鶴年紙帳

誰搗霜藤萬杵勻  
製成鶴帳遠塵氛  
香生蘆絮秋將老  
夢熟梅花夜未分  
枕上不迷巫峽雨  
牀頭常對剡溪雲  
竹爐松火茶煙暖  
一段餘清總屬君

鄂拉實克丹

鶴年次兄

題九靈山房圖

夢裏家山十載違丹青咫尺是耶非墨池新水春還滿  
書閣浮雲晚更飛張翰見機先引去管寧避亂久忘歸  
人生若解幽棲意處處林丘有薜薇

王逢

字原吉江陰人至正中作河清頌臺臣薦之稱疾  
辭避亂於松之青龍江復徙上海烏涇自號最閒  
園丁藩鎮交辟不就明初錄用亦堅  
辭年七十卒有梧溪集七卷行世

遊崑山懷舊

丈夫貴善後事或失謀始桓桓張楚國挺生海陵鄙一  
門蓄大志羣雄適蜂起玄珠探覽社白馬飲浙水三年  
車轍南北向復同軌量容甘公說情厚穆生醴誓擊祖  
逖楫竟折孫策筵天王詔褒贈守將躬歲祀翼然東昆  
丘蘭櫟映疏綺青繁春薦豆翠柏寒動祭乾坤宥孤臣  
風雨猖五鬼銅駝使有覺洊懼臥荆杞

張士誠降元元  
追封士德為楚

國公廟祀昆山楊廉夫  
詩所謂先封楚國碑也

過楊員外別業

公名乘字文戴濟南人至正十  
六年不受淮張之辟遂引決焉

翠羽無深巢麝香無隱穴由來老蚌珠淚泣滄海月於  
乎揚員外竟類膏自熬憶昨佐南省四境正騷屑朝廷  
忌荊人軍事莫敢說遂罹池魚禍逆被柳惠黜寄身傍  
江潭乃心在王室星躔錯吳分氣候乖鄒律天風搖青  
膏徒步空短髮譙玄初謝遣龔勝終守節譬如百鍊鋼  
不撓從寸折又如合抱松豈藉澗底藥我時浮扁舟鷗  
外候朝日荒郊無留景別業自深鬱時清議勸忠公冤  
果昭晰大名流天地當與河水竭結交卣卓間遺言見

餘烈

往數名開化二鄉掩骼

分藩多賢勞不敏忝賓客雖無官守拘亦復與言責二  
鄉虔劉禍慘淒長平厄先王制禮經孟春當掩骼僕夫  
有難色欸段纔任策駸駸度岡坂渺渺循藪澤稍稍煙  
微青歷歷野四白游魂行草上遺老候道側我豈物役  
徒茲來出心臆皇天久下憫赤子非寇敵鴟鳥何不仁  
銜啄血更瀝因歌戰城南風悲淚狼籍



天門行

天門高高俯四極寸田尺地登版籍澤梁無禁漁者多  
潮海干戈恣充斥去年官饗私欲攘今年私醯官價償

屠燒縣邑誠細事大將

謂博羅特  
穆爾左丞

不死鯨鯢鄉烹羊椎

牛醉以酒腰纏白帶紅帕首定盟歛血許自新禦寇征

蠻復何有國家承平歲月久念女紛紛迫餬口羽林堅

銳莫汝櫻慎勿輕誇好身手春風柳黃開陣雲號令始

見真將軍

博羅特穆爾討方谷真兵敗被  
執為求招安至正辛卯歲也

宋制置彭大雅瑪瑙酒椀歌周伯溫大參徵賦有

序

今大尉開藩之三月命部將王左丞晟書使踵海上  
招至吳中以予無錫避地說晟勸張楚公歸元擢淮  
省都事辭時江浙叅政周公適涖分省延飲齋閣懽  
甚出瑪瑙酒椀曰此彭大雅燕饗舊物子才器足當  
之遂引滿酌之再氣酣思湧率爾走筆記清賞非求  
知他人焉歌曰

淮藩開吳豪俠滿歌鐘地屬姑蘇館相儒獨為緩頰生  
笑出彭公瑪瑙碗血乾智伯髓不腥黃玉瑩錯紅水精  
妖蟆蝕月魄半死虹光霞氣歎且盈隱若陣偃邊將營  
彭公彭公古烈士重慶孤城亦勞止天忘西顧二十年  
畝盡東來數千里武侯祝文何乃偉敗由宋祚民今祀  
太湖底寧魚米豐官廨喜與閒門同酒波盃面動峽影  
想見師攜飄風中再酌庶沃礫磊胸君不見漢家將軍  
五郡封班彪天與世史功詩狂昭諫客吳越存心唐室

人憐忠嗚呼尚友子豈敢醉墨慘澹雲飛鴻

七月聞河南平章凶問

六月妖星芒角白幾夜徘徊天市側尋聞盜殺李上公  
窮旅孤臣淚沾臆當時寬猛制崔澤安得受降反受敵  
上公忠名垂竹帛書生奚為費禕惜東南風動旗黃色  
蒲稍天馬長依北壬寅六月田豐王士誠刺殺李忠襄  
于濟南城下先是庚申君見星變歎  
曰當損大將馳使戒諭忠襄  
正此詩所謂妖星芒角也

劉夫人

劉夫人至正太尉吳王嬪笄珈車服置弗御澹煙常鎖  
雙眉春中州援遠敵在目叔貴日驕彊日蹙背城借一  
王本心狐狸狐搢將軍欲夫人勇決烈女義百口樓居  
親舉燧片時陰慘萬世生月明風清珮音至君不見男  
兒成敗古有之孰以楚霸輕虞姬蘇民安得夫人祠烏  
栖白鳧庶少衰

寄桃浦諸故知即事

五首

素癡得名侯君房自享大案焦征羌莫嫌衛旌不舉筋

口簡授使多嚴光世間堪鄙是何物糞土之英禪中虱  
後園石壁倚秋林醉有髻孫旁執筆

山牀折足琴暗徽種菊不種西山薇願從漢士碑有道  
夢逢秦鬼歌無衣間園不入烟火境巨浸盡漂桃土梗  
老伴惟餘臥隴雲抱晦含光體常靜

有章擲還太尉閣有版不受丞相垣南朝天子許謝病  
竊長木石儀鸞園平生氣節詩千首才非元亞山遺甘

劉後

劉靜修

素聞魯廟鑄金人晚學程門坐泥偶雙平原

裏

新得原名

庶全歸他日壙銘辭大手

貴不難得富可嗟二事亦到園丁家雷王藥吏錦襠袴  
野藤絡樹金銀花園丁橫筇坐梧下竊愧長年釋耕者  
身膏草野身土苴語孫耰耨莫輕把

東坡楚頌存虛名止烏作亭

烏涇新作

殊有情枇杷換葉何

青青雪中開花來遠馨多仁多核知爾少柏樹根添鄭  
玄草慧海禪師識侯景華容兒女哭劉表如何太白謫  
仙人竟坐夜郎唐絕徼裁詩寄語多才郎塵間寵辱要

相忘霸橋吟興驢背上月盡冰壺蘆味長

此原吉戊辰歲即事寫懷

寄故知之作  
蓋絕筆也

小七首歌

水晶生苗月牙直  
慧芒披雲電流隙  
蟄蛇斷尾短草間  
海鵲褪翎霜雪色  
宋斤魯削讓隋刻  
金錯錐刀豈其敵  
吳鴻扈稽飛著體  
不曾為主開邊鄙  
嗟茲神物久泥滓  
用之可以報國士  
簷冰卓筋日黠空  
稍玩股掌生雄風  
鮫魚室臥縞帶影  
長鉞辟易萬雉墉  
古昔客堪秦王胸



幾仆翠鳳咸陽宮由來意氣泰山重命甘燎毛不旋踵  
誰隳古制鑄小之佩稱衣冠加珎琫我歌三歎淚滿裾  
曹縛豫聶無時無

夜過蒼墩江隱居

白茅蕭蕭風色昏歸人自語烟際村我騎蹇驢童抱尊  
記得君家忘卻門徑穿竹入背江路傍是梁朝敬宗墓  
月中對鶴吹洞簫露水琤然落高樹

常州江陰再失無錫告警病中自鴻山將遷海上

病就山中隱烽催海上舟連城新鬼哭深壁大臣羞赤  
青纏金火炎風汗馬牛遙占女兄弟先已下長洲

聞畿甸消息

白草生畿甸黃沙走塞庭直憂星入斗兼畏雨淋鈴殿  
閣餘龍氣衣冠自鵠形吳粳斷供餉隴麥向人青

得兒掖書時戊申歲

客夢躬耕隴兒書報過家月明山怨鶴天黑道橫蛇寶  
氣空遺水春程不見花衰容愧耆舊猶語玉人車

此詩  
戊戌

申歲正月洪武  
改元之年也

宮中行樂詞 二首

羽獵罷長楊宸遊入未央  
鸞開雙畫扇鶴舞百霓裳  
玉盃瓊花露金盤紫蔗霜  
長門誰閉月流影在滄浪

芍藥為離草鴛鴦是匹禽  
君無神女夢妾有楚王心  
日短黃金屋宵長綠綺琴  
相將戒霜露拜月繡簾陰

近故 二首

近故儒林老於予起歎嗟  
清秋書柿葉落日賦桃花  
碑

碣留吳滿雲山向越賒多情楚宮月來照未栖鴉

近故維揚老威儀本漢官才高三禮賦心折一泥丸露

氣金盤濕簫簫聲碧落寒空餘茂苑樹鵲血幾時乾

成廷珪寓

於維揚卒於至正末  
年此二詩為成而作

錢塘春感 四首

紫罽輶車從六龍盡隨仙曲度青空蒼山樓闕旃林裏  
赤羽旌麾野廟中百姓未忘周大賚成都元有漢遺風  
流鶯不管傷春恨衝落桃花滿樹紅

玉氣凌虛散曉霞  
虎闌麟閣靜烟花  
中天日月迂黃道  
滄海風雲冷翠華  
望帝神遊夔子國  
烏衣夢隔野人家  
當時舉目山河異  
豈但紅顏泣塞笳

周南風俗古衣冠  
五色雲中憶駐鑾  
璫珞檜高藏白獸  
藥珠花發降文鸞  
河通織女機絲濕  
雨歇巫娥翠黛寒  
滿地吳山誰灑淚  
一江春水獨凭闌

日華初動袞衣明  
劔佩千官隱繡楹  
五色黼函開玉座  
九重湯藥下銀罍  
書題鳳尾仙曹喜  
恩浹螭坳學士榮

文化有餘戎事略銅駝草露不勝情

秋感 二首

紛紛攘攘厭黃巾妖血徒膏草野塵馬化一龍猶王晉  
楚存三戶未亡秦颶風天靜浮青海朔漠山高直紫宸  
莫為鬼方勞外伐縻弧箕服最愁人

南越東吳帶楚皋頻年醉眼送飛毛滄洲露白蒹葭滿  
甲第秋聲蟋蟀高九日天涯桑落酒三軍城上拓黃袍  
試觀漢後詩人作獨覺遺風屬阮陶

聞鐘

首宿胡桃霜露濃衣冠文物歎塵容  
皇天老去非無姓衆水東朝自有宗  
荆楚舊煩殷奮伐越陀新拜漢官封  
狂夫待旦夕良苦喜聽寒山半夜鐘

聞吳門消息

百尺齊雲半壁開陪臣猶進九霞杯  
蓬星氣白干天棓苔水烽青入露臺  
盡擬田單收故土不期高幹損雄材  
淮魚斷信燕鴻隔吳樹蕭蕭葉下來

無題 五首

五緯南行秋氣高，大河諸將走兒曹。  
投鞍尚得齊熊耳，卷甲何堪棄虎牢。  
汧隴馬肥青苜蓿，甘涼酒壓紫蒲萄。  
神州比似仙山固，誰料長風掣巨鰲。

無題前後十首皆感悼明師入燕庾

申北狩之事

天槍幾夜直鈎陳，車駕高秋重北巡。  
總謂羽林無猛士，不緣金屋有佳人。  
廣寒霓仗閒華月，太液龍舟動白蘋。  
雪滿上京勞大饗，西封華嶽弔秦民。



白衣艤渡吳兵赤羽旌旗奪趙營灤水天迴龍虎氣  
榆林風逐馬駝聲靚妝宮女愁啼竹白髮祠官憶薦櫻  
猶有燕鷹神不王駕鵝高去塞雲平

五城月落靜朝雞萬竈烟消入水犀椒闥珮琚遺白草  
木天圖籍冷青藜北臣舊說齊王肅南仕新聞漢日碑  
天意人心竟何在虎林還控雁門西

十載羣雄百戰疲金城萬雉自湯池地分玉冊盟俱在  
露仄銅盤影不支中夜馬羣風北向當年車轍日南馳

獨憐石鼓眠秋草猶是宣王頌美詞

書無題後凡三首偶感燕太子丹事

火流南斗紫垣虛芳草王孫思愴如淮潦浸天魚有帛  
塞庭連雪雁無書不同趙朔藏文祿終異秦嬰袒素車  
漆女中心漫於邑杞民西望幾踟躕

塞空霜木抱猿雌草暗江南罷射麋秦地舊歸燕質子  
瀛封曾畀宋孤兒愁邊返照窺墻榻夢裏驚塵喪鞢鵠  
莫識白翎終曲語蛟龍雲雨發無時

元世祖聽彈白翎  
雀曰何其曲終有

淒怨之  
聲乎

幾年薪膽泣孤嬰一夕南風馬角生似見流星離斗分  
謬傳靈武直咸京九苞雛鳳冲霄翼三匝慈烏落月情  
縱少當時趙雲將臥龍終始漢臣名

洪武七年遣瑪勒  
岱巴拉北歸此詩

記其事故有舊歸質子及南風馬角之句明祖封  
瑪勒岱巴拉為崇禮侯故曰瀛封曾畀宋孤兒也

### 寄錢泰窩陳雪軒二遺叟

天轉雲東上六符有懷無寢枕同孤紫芝隱曲歌商皓  
烈火殘經補漢儒私地春先梅老發盛陰雷疾草狂蘇

祖生遲旦疎殊甚不計中流少一壺

甲子冬偶書

雲東亂定少新知江左書來有跛兒才盡能為文自祭  
醒狂寧要鍾相隨天家青女催衣急漏水金人上箭遲  
卻喜故鄉原上樹十年羈羽託深枝

西廈

牀頭鴟臥久空金壁上蝸行尚有琴儒子成名狂阮籍  
霸才無主老陳琳虹霓氣冠登萊市蝙蝠羣飛顧陸林

環海烟沙翻萬鋪連村霜月抱孤衾

送于子實辟淮閬掾

淮海風高急鼓鞶潁州烽火照淮西  
餽糧幾道通流馬樓櫓重城望火離  
星入夜寒芒角動地連秋暝瘴氛低  
君今掉鞅元戎幙宵懃流亡父老啼

秋詞

香散天街靜玉珂露臺風殿夜如何  
星從河漢澹中落秋在梧桐疎處多  
鸞影不曾離寶鑑蛛絲先已綴金梭

君王蘭館詢遺事卻擬鑾車共載過

贈別浙省和和左丞國寶自常州移鎮徽州三十

韻時歲癸巳

武德興元運文恬近百年一隅初難作四境遂兵連  
斧辰朝元早彤弓授命專馮岑材並濟李郭駕爭先  
路入延陵邑星分左轄躔著名黃閣上虛位紫宮前  
汗血駒千匹跼跼士兩甄帳寒龍守劔城曙虎飛旃  
跡掃齊門瑟身親楚醴筵慧山屏列野震澤鏡涵天  
刁斗軍中堠

鉏犁亂後田白無遺朽骨青有續炊烟插羽書間署封  
泥詔撫邊陣容催画鼓蠡氣動樓船舊政猶霜肅新安  
素地偏蜉精嘗感夢帝子或逢仙漆葉雲羞密茶花雪  
妬妍誦絃家櫛比冠蓋里班聯鄒魯流風洽甌蠻習俗  
遷比來疲賦斂况復值戈鋌餽廩官曹待謳歌父老傳  
挽屯吳幼節總制漢文淵裴度歸休近羊公臥治便鼎  
彝今燁赫韋布數周旋小閣牛行炙長楸鶻試拳王彝  
五雜組孫武十三篇區服殘河汴神州巋薊燕殄除纔

蚺螭睥睨滿鯨鱣狂斐言姑及高明義莫捐憂君尚有  
疏儻寄麥光牋

奉寄趙伯器參政尹時中員外

詔立淮南省符張閫外兵風雷朝煥發牛斗夜精明參  
政材超偉元僚器老成武林多樹政禁禦舊蜚英鳳暖  
文章蔚鯤秋羽翼橫天池今並奮解管後和鳴地要尤  
膏沃時危必戰爭輔車依海岱衣帶限蠻荆玉葉開王  
邸烟花匝子城萬艘鹽雪積千里稻雲平織貝殊珍粲



紅樓艷曲縈黃綠胥狡黠貨殖駟驕盈汝稷初萌起河  
流寢妄行鎮綏增屏翰贊画授權衡愛稼須除莠憐牛  
貴搏蝨式蛙曾霸王斬馬乃書生青汗三千牘丹心一  
寸誠相臣連萬騎郡邑望雙旌覺社湖移蚌綠絲井露  
鯨里無安堵樂野有望塵驚瀉鹵烟侵燧孤嫠胆碎鉏  
五賢迷古轍六詠歌新賡瓦礫皆王土逋逃本爾氓長  
驅勞組練盡掃愧櫓槍喻擬相如檄降懲白起坑跋胡  
狼曷備毒尾蠱難櫻濟猛收神略疏恩渙寇情佇聞鹿

柵下莫作鬼方征回鶻卑唐室天驕撓漢營乾坤一羽  
扇社稷幾羊羹杖社交加影芙蓉裊娜莖超然延爽笏  
肅若衛寒更慮念真如是功勲孰與京誓清懷晉逖虛  
左慕齊嬰好定龍蟠價毋登狗盜名石洪重脣辟韓愈  
建封迎故典何其盛斯文與有榮中州襟陝隴上國掖  
幽并麟閣將來繪雞壇宿昔盟芻蕘言慎擇葵藿義同  
傾

和戎婦陳聞雁有感

介冑多年蟣蝨生  
客窗今夜落邊聲  
螭頭釵子鴛鴦股  
獨自挑燈萬里情

雜題二首

洄塘昨夜綠波增  
偶策交州鬼面藤  
一雨百花香洗盡  
流春砑上立魚鷹

紫桐生乳竹含胎  
草細花幽石徑回  
獨自去來人不覺  
茶烟風颺過池臺

宋元詩會卷九十四